

抱朴子外篇卷之二十八

百里

抱朴子曰三台九列坐而論道州牧郡守操
綱舉領其官益大其事愈優煩劇所鍾其唯
百里衆役於是乎出調求之所叢赴牧守雖
賢而令長不堪則國事不舉萬機有關其損
敗豈徒止乎一境而已哉令長尤宜得才乃
急於臺省之官也用之不得其人其故无他
也在乎至公之情不行而任私之意不遠也
或父兄貴重而子弟以間望見選或高人屬
託而凡品以无能見敘或是所宿念或親戚
匪他知其不可而能用也等亦時有快者不
為盡无所中也要於不精者率多矣其能自
獨立勉修清約夙夜在公以求衆譽懼風績
之不美恥知己之謬舉歟矣庸猥之徒器小
志近冒于貨賄唯富是圖肆情恣慾无止无
足在所司官知其有足賴主人舉劾彈糾終
於當解慮其結怨及見中傷不敢犯觸而恣
其貪殘矣如此黎庶亦安得不困毒而離叛
離叛者衆則不得不屯聚而為群盜矣夫百

尋之室焚於分寸之颺千丈之波潰於一蟻
之穴何可不深防乎何可不改張乎而秉斤
兩者或舍銓衡而任情掌柯斧者或曲繩墨
於附已選之者既不為官擇人而求之者又
不自謂不任於是蒞政而政荒牧民而民散
或有穢濁驕奢而困百姓者矣或有苛虐酷
烈而多怨叛者矣或有聞塞通憤而庶事亂
者矣或有潦倒踈緩而致弛墮者矣或有好
興不急而疲人力者矣或有藏養遁逃而行
凌暴者矣或有不曉法令而受欺弄者矣或
有以音聲酒色而致荒蕩者矣或有園囿樵
菑而廢政務者矣或有田獵遊飲而忘庶事
者矣或有不省辭訟而刑獄亂者矣百姓不
堪起為寇賊疊欲發聞寘于叢棘虧君上之
明益刑書之煩而民之荼毒亦已深矣夫用
非其人譬猶被木馬以繁纓何由騁迹於追
風以壞龍當雲雨安能耀景於天衢哉若東
國之鈞出納王命者審良樂之頌盼不令跛
蹇厠駸駸冒昧苟得闡於自量者慮中道之
顛躓不以驚箭服鸞衡則何患庶績之不康

何憂凶凶之不退三皇豈足四五帝豈難六
哉

抱朴子外篇卷之二十八